


TEZAU LITURGIC

30 IULIE

**SLUJBA
SF. CUVIOS
ANATOLIE II
POTAPOV
DE LA OPTINA**



**MINEIUL PE IULIE
MOSCOVA**



Месяца иулия в 30-й день

Преподобного Анатолия

Оптинского, Младшаго

На велицей вечерни

На Господи, воззвах: стихиры, глас 2.

Подобен: Егда от Древа:

Егда искусися разжженная твоя любви/
поруганием, осмеянием и злостраданием многим,/
тогда воистинну орган Утешителя Святаго Духа
явился еси, / человеколюбное к мучителем показуя, /
и, евангельски тех благословляя, / о вразумлении их
молился еси, / человече Божий, Анатолие, / обители
Оптинския украшение.

Истинному Владыце, Христу и Богу нашему, /
очищенным умом предстоя неотступно, / званный по
достоянию, / отче богомудре Анатолие, /
човеколюбно о душах человеческих попечение
имея, / помощь и исцеления обильно всем подавал

еси/ и, шатания безбожных обличая,/ терпением и любовью вся препобедил еси.

Егда время прославления твоего наста/ и к сонму святых достойне приложился еси,/ тогда, Небесным силам радость даруя/ и велие празднество нам устрояя,/ вся собрал еси, отче, к похвалению твоему/ и одарил еси миром, Анатолие./ Да пролиется молитва твоя и ныне,/ и суд на милость преложит Господь,/ и слава будет всем преподобным Его.

Слава, глас 6:

Возсия днесь честная память/ преподобнаго отца нашего Анатолия,/ созываючи всех на трапезу духовную,/ сей бо, скорбем народа Божия болезнуя,/ тако со дерзновением глаголаше:/ с Богом мы вся претерпим до конца./ И, сие делом показуя,/ себе мужественне преуготова в путь,/ егоже, и совершив, во стране живых ныне водворяется/ и молится о душах наших.

И ныне, Богородичен догматик, Кто Тебе не
ублажит:

Вход. Прокимен дне. И чтения преподобническая 3.

На стиховне стихиры, глас 5:

Господни заповеди и отеческая повеления/
душею чистою и несумненным умом/ благочестно
восприим, богомудре,/ яко щедрый благодетель,/
всех богатством Божиим обогащаеши./ Темже,
терпению твоему дивящися, сие вопием:/ радуйся,
преподобне отче Анатолие,/ добрый и кроткий
утешителю,/ образом добронравного жития твоего
нас научай.

Стих: Честна пред Господом/ смерть преподобных
Его.

Ангельски на земли пожив, богомудре Анатолие,/
усердно Амвросию преподобному послужил еси,/
любвию же тому подражая,/ верный ученик явился
еси./ Ныне же, Престолу Владычню вкупе
предстояще,/ молитесь ко Господу, преподобнии,/ да
помилует души наша.

Стих: Блажен муж, бояйся Господа,/ в заповедех
Его восхощет зело.

Приидите, добродетели рачителие,/ духовный лик
достойно составльше,/ ублажим Анатолия
богомудраго,/ той бо, яко делатель изрядный,/
исповедник явился в годину лютую/ и, восприем от
Христа воскресения светлость,/ всех возлюби
отечески,/ и ныне во Царствии Небеснем/ молится об
отечестве нашем.

Слава, глас 6:

Подвизи и молитвы преподобных отцев/ обитель
Оптинскую вертоград духовный соделаша,/ в ней бо,
богомудрии старцы подвизавшесе,/ многия люди на
путь истинный наставиша./ От них же и преподобный
Анатолий,/ яко милостивый отец и кроткий
утешитель явился,/ иже, всякаго приходяща николиже
отгнав,/ но любовью своею согревая,/ до ныне длани
простирает отечески/ и молит Господа помиловати
души наша.

И ныне, Богородичен, глас тойже: Творец и
Избавитель мой, Пречистая:

Тропарь, глас 2:

Блажен еси, утешителю Оптинский Анатолие,/ яви бо Дух Святый тя премудра наставника/ и веры твердаго исповедника./ Сего ради зовем ти:/ утеша души наша смятенныя/ и мрак безбожия разори/ твоими к Богу молитвами.

На утрени

По 1-м стихословии седален преподобному, глас 2:

Блажен еси, отче наш Анатолие, яко, за святую Православную веру мужественне подвизаяся, верно пожил еси и, за свидетельство Истины пострадав, без крове победу Ея утвердил еси. Темже, тя чтуще, зовем: радуйся, похвало и украшение, и утешение наше.

Слава, и ныне, Богородичен:

Блажим Тя, Дево Чистая, яко родила еси Иисуса, Иже Сын Вышняго наречеса, и Царствие Его не преидет во веки. Того величающе, Тя ублажаем.

По 2-м стихословии седален преподобному, глас 2:

Яко постника благочестна и искусна, и
страдальца многотерпелива, и наставника людям
Божиим изрядна и верна, в песнях достойно Анатолия
восхвалим, всех возлюбившаго.

Слава, и ныне, Богородичен:

Яже миру радость сущи, Богородице Чистая,
радуйся, Тебе зовем со ангелом: сподоби радости
небесныя Тя величающия.

По полиелеи седален, глас 4:

Страсти телесныя подвиги умертвив,
деннонощными молитвами древняго змия поправ и
струями слезными душу от всякия скверны омыв,
Богу любовью вельми угодил еси, Анатолие. Темже и
дарова тебе чудес благодать Иисус Человеколюбец,
Спас душ наших.

Слава, и ныне, Богородичен:

Божественнаго мя входа, Чистая, сподоби
молитвами Твоими, Приснодево, узы лютых страстей
расторгни и пламене будущего свободы.

Степенна, 1-й антифон 4-го гласа. Прокимен, глас 4: Честна пред Господем/ смерть преподобных Его. Стих: Что воздам Господеви о всех, яже воздаде ми? Евангелие от Матфеа, зачало 43.

По 50-м псалме стихира, глас 6:

Безмерна Твоя, Христе Царю, благодать/ и дарование велие:/ не токмо бо живый немощныя укрепляет,/ но и по смерти силою Твоею/ исцеления подает с верою приходящим/ угодник Твой Анатолий./ Темже взываем Ти, Благий Владыко:/ молитвами преподобнаго Твоего спаси души наша.

Канон Богородице, и преподобному, в Богородичнах обносяй преподобнаго имя. Глас 2.

Песнь 1

Ирмос: *Грядите, людие,/ поим песнь Христу Богу,/ раздельшему море и наставльшему люди,/ яже изведе из работы египетския,/ яко прославися.*

Господи, даруй ми смысл благий, да скудными силами моими, воспою Анатолия Младшаго, Оптинскаго старца великаго, яко прославися.

Воистинну Святаго Духа осияние от юности сподобився прияти, душевною чистотою блистаеши, преподобне, Света Трисолнечнаго приятелище.

Провидевый устроение душевное и исцеление от недугов ведый, утешитель показался еси, Анатолие, всем изряден и искусный врач духовный.

Якоже первии старцы Оптины пустыни, Лев и Макарий, добрый быв купец, Анатолие, Бисер драгоценный предпочел еси, о Немже и прославися.

К стопам великаго Амвросия усердно припадая и досточудному Иосифу главу смиренно приклоняя, напитался еси боголепных добродетелей и обителище Святаго Духа был еси.

Богородичен: Аще и заблудихом во гресех, обаче на Тя уповаем, Мати Божия, и надеемся на милосердие Сына Твоего.

Песнь 3

Ирмос: *Утверди нас в Тебе, Господи,/ Древом умерщвлей грех,/ и страх Твой всади/ в сердца нас, поющих Тя.*

Улучити желая жизнь вечную, от страстей очистил еси душу твою, богомудре, и, благодать восприем, исцеления изливаеши к раце твоей притекающим.

Воистину украшен благодатию и утешение сею препода^я обильно, Анатолие, утешителю благодатный, грехов отпущение нам испроси.

Имя твое, преподобне Анатолие, на Востока востоков указывает, сего ради выну к Тому устремлялся еси, к Немуже направи нас, поющих тя.

Амвросию преподобному прилепился душою любвеобильною, Анатолие, любовью совершенною одаряеши души всех, поющих тя.

Богородичен: Надеющиеся на Тя, да не погибнем, но да избавимся от бед, Мати Божия, под кровом бо Твоим храниши всех нас, поющих Тя.

Седален, глас 6:

Водами духовными, яко река, наводняемъ, всю землю нашу исполнил еси богомудрыми утешеньми, и преславных исцелений дарованьми, темже, Анатолие преподобне, моли о душах наших.

Слава, и ныне, Богородичен:

Яже Бога и Спаса рождшая, моли
Мирона начальника Превечнаго, послати вскоре миру
мир, да в мире Того славословим.

Песнь 4

Ирмос: Услышах, Господи,/ славное Твое
смотрение/ и прославих, Человеколюбче,/ непостижимую Твою силу.

Духовною благодатию, мудре Анатолие, пламень
страстный угашаеши, предстателю наш верный и
готовый всем верным помощниче.

Наставник дивный познался еси, отче, еще не
сущу тебе в сане иерейстем, мнози убо людие тогда
узреша в тебе Божие избрание.

Дар прозорливости даде тебе Господь, еже
вразумляти люди Своя, ты же, отче, людем послужил
еси дарованною ти благодатию.

Анатолие преподобне и Нектарие чудне, друг ко
другу братолюбие имуще, Христу уподобистесь,
благодати Божия стяжателие.

Богородичен: Ангелы чистотою превозшедшая,
помози нам от грехов очиститися, яко немощни есмы,
обаче тепле надеемся на Твою помощь, Мати Божия.

Песнь 5

Ирмос: *Света Подателю и веков Творче, Господи,/*
во свете Твоих повелений настави нас,/ разве бо Тебе,
иного бога не знаем.

Очистившу ти око умное, преподобне, благодать
приял еси, яко пророк, прозревати душ сокровенная
и предглаголати дальняя и безвестная.

Саровскому подвижнику уподобився, радостию
воскресения Христова светился еси, отче, больши бо
тоя, иныя радости не знал еси.

Аз всегда пребываю zde, с любовью глаголаю еси,
старче мудрый, темже и по смерти подаеши нам
недоумений разрешение.

Богородичен: Твой, Мати Божия, покров
молитвенный осени путь Анатолия преподобнаго,
разве Сына Твоего, иного бога не знавша.

Песнь 6

Ирмос: *В бездне греховней валяясь,/ неизследную милосердия Твоего призываю бездну:/ от тли, Боже, мя возведи.*

Врачевание безмездно болящим явися Божественный храм обители Оптинския, стяжа бо мощи твоя честныя, отче Анатолие, яко источник, точащий исцеления.

Очисти сердца наша и мысли ходатайствы твоими, отче, и, приим приносимыя тебе молитвы, испроси у Христа нам велия милости.

Отче Анатолие, телесныя болезни находят на нас и соблазны окружают, но изми убо ны от сих молитвами твоими, врачу в немощех и утешителю в скорбех.

Отверзая источник благодатный в тебе Господь, вся призва к Себе прибегати, подавая, Анатолие, тобою оставление и лютых пременение.

Богородичен: Оскудехом благочестием и в бездну отчаяния впадохом, но молитвами Твоими, Мати Божия, нас возведи.

Кондак, глас 2:

Крест Господень усердно восприим, отче богомудре Анатолие, Христу до смерти последовати возжелел еси, исповедниче истины доблий и благодати сосуде предивный.

Икос:

Людие Божии, почудимся вельми о преславных деяниях Бога нашего и честного отца, блаженного Анатолия, почтим и песнь благодарственную Христу Богу и Пречистой Матери Его воспоим, яко даровася нам в последняя лета исповедник истины доблий и благодати сосуд предивный.

Песнь 7

*Ирмос: Образу златому на поле Деире служиму,/
трие Твои отроцы небрегоша безбожнаго веления:/
посреде же огня ввержени, орошаеми пояху:/
благословен еси, Боже отец наших.*

Болезни чад твоих врачевавый, отче, бдения не оставляя еси своих болезней ради, но со отроки воспевал еси: благословен еси, Боже отец наших.

Помыслы своя тебе открываху братия, обаче свободы их никакоже похищал еси, отче, любовию следовати научая благословенному Христу, Спасу отец наших.

Воистину Христа Бога нашего, Солнца Незаходимаго, в себе стяжавый, отче Анатолие, просвети неразумие наше и грехов оставление нам испроси.

Богородичен: Любоблагая Дево Мати, яко облак, росу животную носиши: темже разжженную пещь страстей моих угаси, молящи благословеннаго Бога отец наших.

Песнь 8

Ирмос: *В купине Моисею Девы чудо,/ на Синайстей горе прообразившаго иногда,/ пойте, благословите/ и превозносите во вся веки.*

Твою воистину честную память почитает пустынь Оптинская, о излияннии чудес поведаящи, еже и ныне приложи еще, Анатолие, пришедшим в сей вертоград преславнаго прозябения.

Сокрушение составов исцелил еси благочестивыя жены, елеа и молитв твоих помазанием, Анатолие, сотворяя ю праздновати весело память твою и тя, отче, благодарити.

Ангельский ум имея, Анатолие, великия умы отвращал еси от мудрования плотскаго, сиречь гордости мирския и духовныя, всем глаголя: Бога единого превозносите во вся веки.

Утешителю, старче Анатолие, сирот Божия Матере Шамординских не оставил еси, научая посреде молвы молитв не оставляти, но Бога пети и благословити во вся веки.

Бури безбожия приближение и погибели великия прозревая, рекл еси чадом своим, Анатолие, яко чудо воскресения явит Господь во время Свое верным, поющим и превозносящим Его во вся веки.

Богородичен: Изведи ны, Мати Божия, из тины страстей и блата лености, да Сына Твоего потщимся пети, благословити и превозносить во вся веки.

Песнь 9

Ирмос: От Бога Бога Слова,/ неизреченною
мудростию пришедшаго обновити Адама,/ ядию в
тлению падшаго люте:/ от Святыя Девы
неизреченно воплотившагося нас ради,/ вернии,
единомудренно песнями величаем.

Слово деятельно и любовь имый неотпадающую,
Церкве Русския явился еси утверждение и пророк в
годину лютую, отче Анатолие, слава же и похвала
обители Оптинской.

Великое воистинну вместилище любви явился еси!
Преподобных сотаинниче и собеседниче святых и
всех верных утешителю.

Освятился еси, отче Анатолие, благодатию, душу
твою за чада полагая: аще и без крове победу твою
совершив, с новомученики венец приемлещи,
блаженне.

Велия сила явился в тебе, преподобне Анатолие,
отче наш, и не довлеет к славе твоей хваление наше,
обаче приими благодарственное моление недостойных

чад твоих, верою и любовью совершающих
всечестную память твою.

Богородичен: Юница благословенная, Мати
Божия, не остави нас, убогих чад Твоих, но юныя
радости исполни, да Воплотившагося нас ради
хваляще величаем.

Светилен:

Анатолие отче, востоку тезоименный, не остави
нас кроме твоего посещения, но к Востоку востоков,
Христу Богу нашему направи ны, да узрим свет
молитвами твоими.

Слава, и ныне, Богородичен:

Сладость ангелов, скорбящих радость, христиан
Предстательница, Дево, Мати Господня, заступи нас и
избави вечных мук.

На хвалитех стихиры, глас 4.

Подобен: Яко добля:

Сосуд честнейший Божественного Духа,/ отцев
твоих дарованьми наполняемь,/ пастырь добрый
явился еси,/ грешным споручник и крепость
изнемогающим,/ кающимся утешение/ и в годину

лютую верным укрепление:/ велия слава твоя и
память с похвалами,/ отче Анатолие блаженне,/
молитвенниче о душах наших.

От обители и паствы твоея несправедливо
изгоняемь,/ скорбем и поруганием приобщился еси,/
яко адамант терпения,/ злобу безбожных кротостию
препобедивый./ Темже удостоился еси блаженные
кончины,/ отче Анатолие священне,/ молитвенниче о
душах наших.

Ангеле земный и человеке небесный,/ органе
Утешителя и утешителю изрядный,/ облаче разумный
благодати,/ капляй всем вразумления богато,/
преподобне Анатолие,/ испроси у Господа людем
Божиим в вере святых укрепление/ и Православию
утверждение.

Слава, глас 6:

Верую твердою укреплен,/ блаженне Анатолие,/
воли Божией всем сердцем предался еси;/ служение
свое до конца совершая,/ обители разоряемая не
оставил еси/ и в молитве непрестанней пребыл еси./

Ныне же, во Обители Небесней Пресвятей Троице
предстоя, / молишися о душах наших.

И ныне, Богородичен, глас тойже:

Богородице, Ты еси Лоза истинная, /
возрастившая нам Плод живота, / Тебе молимся:
молися, Владычице, / с преподобными отцы
Оптинскими / помиловатися душам нашим.

Славословие великое и отпуст.

На литургии

служба преподобному.

**[Священный Синод на заседании 16-17 июля
2020 года (журнал № 34) утвердил к
общецерковному богослужебному употреблению
текст службы преподобному Анатолию
Оптинскому младшему]**

